

直隸絳州志卷之十

人物上

周

梁 弘晉人桓王十一年曲沃武公伐翼弘爲右

韓 萬晉莊伯弟也桓王十一年曲沃武公伐翼萬御
戎逐翼侯於汾隰駮絳而止夜獲之

原 黯曲沃武公臣桓王十三年曲沃滅荀以其地賜
之是爲荀叔

士 蔦晉獻公時爲大司空桓莊之族偪獻公患之用
士蔦謀盡殺羣公子使城絳晉始都焉又諫伐虢諷

直隸絳州志

卷之十

人物上

一

太子申生逃無使罪至悼公時命右行辛爲司空使
修士蔦之法

趙 夙爲晉獻公御戎以滅耿滅霍滅魏還賜趙夙耿
爲大夫

畢 萬晉獻公時爲戎右滅耿霍及魏賜畢萬魏爲大
夫卜偃曰畢萬之後必大萬盈數也魏大名也以是
始賞天啟之矣

里 克晉獻公時爲中大夫公使太子申生伐東山臯
落氏克諫君之適嗣不可以帥師後驪姬欲譖太子
而難里克使優施以歌試之計乃得行後卒殺奚齊

卓子而欲納文公惠公立伏劍而死

荀息晉獻公時大夫以屈產之乘垂棘之璧假道於虞以伐虢師還滅虞後傅奚齊獻公疾以孤托之後里克殺奚齊荀息立公子卓以葬里克復殺之荀息死之

狐突晉獻公時大夫太子申生伐東山臯落氏突爲御戎太子將戰突諫曰昔辛伯諗周桓公云內寵並后外寵二政嬖子配適大都耦國亂之本也今亂本成矣季而安民子其圖之與其危身以速罪也後懷公立命無從亡人期而不至無赦突子毛及偃從重

直隸絳州志

卷之十

人物上

二

耳在秦不召懷公執而殺之

卻豹字叔虎爲晉獻公大夫伐狄相豹乘城被羽先升遂克之子芮事公子夷吾驪姬之亂隨夷吾出亡賂秦以求入襄王三年立爲惠公平鄭言於秦伯召呂甥卻稱冀芮臣出晉君公納重耳秦伯召三子芮曰幣重而言甘誘我也遂殺平鄭及文公入謀焚公宮而弑之不獲秦伯誘殺之

慶鄭晉惠公時大夫秦饑乞糴於晉晉人弗與慶鄭曰背施無親幸災不仁貪愛不祥怒鄰不義何以守國弗聽秦伯伐晉晉侯逆秦師乘小駟鄭入也慶鄭

曰乘異產以從戎事及懼而變將與人易君必悔之
弗聽遂獲於秦

韓 簡韓萬孫晉惠公時爲大夫襄王八年秦伯以閉
糴之故伐晉公使簡視師復曰師少於我鬪士倍我
出因其資入用其寵饑食其粟三施而無報是以來
也今又擊之我怠秦奮倍猶未也及戰秦獲晉侯以
歸初獻公筮嫁伯姬於秦遇歸妹之睽史蘇占之曰
不吉及公在秦曰先君若從史蘇之占吾不及此簡
侍曰龜象也筮數也物生而後有象象而後有滋滋
而後有數先君之敗德可及數乎史蘇是占勿從何

直隸絳州志

卷之十

人物上

三

益

瑕呂飴甥字子金晉惠公自秦使卻乞召之飴甥教之
言曰朝國人而以君命賞且告之曰孤雖歸辱社稷
矣其卜貳圉也衆皆哭乃會秦伯盟於王城秦伯曰
國謂君何對曰小人感謂之不免君子恕以爲必歸
秦伯曰是吾心也乃歸晉侯

趙 衰字子餘趙夙弟從晉文公出亡在外十九年以
壺殮從餒而弗食秦伯享公子犯曰吾不如衰之文
請使衰從文公立初爲原守後佐中軍衰從亡時狄
人以叔隗妻衰生子盾文公又妻以女生原同屏括

樓嬰卒諡成

狐 毛狐突子從晉文公出亡城濮之戰毛設二旆以敗楚

狐 偃字子犯狐突子從晉文公出亡獻公薨秦伯召文公公對以喪人無寶仁親以爲寶偃實教之及齊齊桓公妻之公安於齊姜與偃謀醉而遣之公入晉偃與秦晉之大夫盟於郟公立勸以勤王城濮之戰佐上軍偃以上軍夾攻子西楚師敗績文公出穀戍釋宋圍一戰而霸皆子犯之謀也

魏 犇畢萬孫初從晉文公出亡城濮之役爲戎右入直隸絳州志
曹夔信負羈氏犇傷於胷公欲殺之而愛其材使視之犇束芻見使者曰以君之靈不有寧也距躍三百曲踊三百乃舍之子呂錡爲晉卿

介之推從晉文公出亡嘗割股以療公饑及文公立賞從亡者之推不言祿祿亦弗及遂與其母隱於綿山而死後文公旌之以田

卻 穀晉文公時將中軍被廬之蒐作三軍謀元帥趙衰曰卻穀可臣聞其言說禮樂而敦詩書君其試之先 軫晉文公時佐下軍城濮之戰以上德故將中軍與卻溱以中軍公族橫擊楚師遂敗之襄公時敗秦

師於穀獲三帥公因文嬴之請釋秦囚軫怒而唾後狄伐晉軫自以爲無禮於君免胄入狄師死焉

胥臣白季從晉文公出亡有功城濮之戰蒙馬以虎皮先犯陳蔡陳蔡奔使過冀薦冀缺於公後襄公以先茅之縣賞之曰舉卻缺子之功也

欒 枝欒賁之孫晉城濮之戰將下軍使輿曳柴而僞遁以誘楚師遂敗之卒諡貞

卻 缺卻芮子初以父罪耕於冀白季使過冀見缺耨妻饁之敬相待如賓與歸言於晉文公以爲下軍大夫襄王二十三年晉敗狄於箕缺獲白狄子公命缺

直隸絳州志

卷之十

人物上

五

爲卿復與之冀河曲柳棼諸戰皆將有功靈公初說趙盾歸衛地復說盾召士會歸晉定王六年代盾將中軍九年求成於狄衆狄皆服於晉卒諡成子克亦執晉政

荀林父晉文公時爲下軍御戎敗楚師於城濮佐下軍敗秦師於河曲景公時將中軍敗於邲後伐鄭滅赤狄賞以千室卒諡桓先是文公作三行以禦狄桓子將中行故爲中行氏子庚佐欒書將中軍庚子偃亦執晉政

士 會士蔦子事晉文公襄公食邑於隨及范故稱隨

季亦稱范季襄公死趙盾使逆公子雍於秦靈公立
雍不得入會奔秦秦人用之晉患焉趙盾用卻缺之
言復會邲之戰會將上軍晉師敗上軍獨不動後執
晉政王室亂會平之趙文子稱爲利其君不忘其身
謀其身不忘其友卒諡武子士燮厲公時佐中軍士
魴悼公時爲卿悼公初政使士渥濁爲太傅修范武
子之法

李 離晉文公之理也過聽殺人自拘當死公曰下吏
有過非子之罪離曰君以臣能聽微決疑故使爲理
今過聽殺人罪當死遂伏劍

直隸絳州志

卷之十

人物上

六

狼 暉爲晉襄公右箕之役先軫黜之其友曰盍死之
暉曰吾未獲死所死而不義非勇也及戰於彭衙以
其屬馳秦師死焉君子謂狼暉於是乎君子

趙 盾趙衰子初佐中軍陽處父謂趙盾能易爲中軍
帥始爲國政制事典正法罪辟刑獄董逋逃由質要
治舊洿本秩禮續常職出滯淹旣成行諸晉國以爲
常法後靈公不君盾驟諫公使鉏麇賊之麇觸槐而
死公又伏甲攻之其右提彌明及公介靈輒救之乃
免卒諡宣子朔爲晉大夫

董 狐晉太史靈公欲殺趙盾盾出奔已而趙穿弑公

盾遂復狐書曰趙盾弑其君以示於朝盾曰不然狐曰子爲正卿亡不越境反不討賊非子而誰孔子稱爲古之良史書法不隱

荀首林父弟晉景公時爲下軍大夫邲之戰彘子以中軍佐濟首曰此師殆哉果遇必敗楚熊負羈囚其子知瑩首曰不以人子吾子其可得乎射連尹襄老獲之射公子穀臣囚之後果以二者易子知瑩歸卒諡莊

韓厥韓萬玄孫晉景公時爲司馬鞍之戰執齊逢丑父以獻趙氏旣滅厥言於公曰成季之勲宣孟之忠

直隸絳州志

卷之十

人物上

七

不可以無後於是復立趙武而反其田簡王元年晉人謀去故絳居郇瑕厥謂不如新田公從之欒書等將弑厲公執厥厥辭曰二三子不能事君焉用厥也後代欒書爲政卒諡獻

欒書盾之子晉景公時佐下軍邲之戰鄭皇戌如晉師曰楚不設備子擊之鄭師爲承書曰鄭不可從我克則來不克遂往以我卜也趙朔善其言曰必長晉國簡王二年書救鄭與楚師遇於繞角楚師還晉師遂侵蔡楚師救蔡趙同趙括欲戰知莊子范文子韓獻子諫不可書曰善鈞從衆三卿爲主可謂衆矣卒

諡武子釁嗣職

伯宗晉大夫景公欲救宋伯宗曰不可天方授楚未可與爭乃止晉侯將伐潞子諸大夫皆曰不可伯宗曰狄有五罪必伐之遂滅潞伯宗每朝其妻戒之曰盜憎主人民惡其上子好直言必及於難後三卻果譖而殺之子伯州黎奔楚

卻克缺之子晉邲之戰佐上軍與士會保其卒不敗定王十五年晉使克徵會於齊齊頃公帷婦人使觀之克登婦人笑於房克怒十八年齊侵魯晉救之克將中軍敗齊師於鞍以洩國恥卒諡獻子錡厲公時

直隸絳州志

卷之十

人物上

八

大夫簡王八年使乞師於魯以伐秦錡佐士燮將上軍敗楚鄭後爲胥童等所殺

魏 穎 犇子初犇有妾無子疾命穎曰必嫁是疾病則曰必以爲殉及卒穎嫁之後定王十四年穎與秦師戰於輔氏見老人結草以抗杜回故獲之夜夢所嫁婦人之父謂曰爾用先人之治命余是以報子頡悼公時爲卿

士 燮 士會子初武子將老屬其從二三子惟敬晉鞍之戰燮佐上軍師還燮後入武子曰無爲我望爾也乎對曰師有功國人喜以逆之先入必屬耳目焉是

代帥受名也故不敢武子曰我知免矣鄢陵之戰燮欲僞逃楚以紓憂師旋使祝宗祈死曰君驕侈而克敵是天益其疾也難將作矣是年卒諡曰文子士匄亦秉晉政

知 瑩荀首子食知邑故稱知氏邲之戰爲楚所囚後首佐中軍晉歸楚公子穀臣楚亦歸瑩後從欒書敗秦師於麻隧又迎悼公於周韓厥老代爲政相悼公以復霸業卒諡武子盈

卻 至卻克族子晉厲公時大夫簡王七年如楚聘且蒞盟楚子享之金奏作於下驚而走出曰下臣不敢

直隸絳州志

卷之十

人物上

九

麻隧之役至佐新軍十一年晉伐鄭復佐新軍戰於鄢陵至三遇楚子之卒見必下免胄而趨風楚師遁明年厲公嬖臣胥童等譖於公卻氏聞之欲攻公至曰受君之祿是以聚黨有黨而爭命罪孰大焉遂與錡犇並遇害

卻 毅卻至弟簡王八年晉伐秦毅御戎欒書子欒鍼爲右戰於麻隧敗之十一年復御厲公鍼亦爲右敗楚鄭於鄢陵

荀 偃林父孫庚子晉鄢陵之役偃佐上軍靈王十三年悼公薨於綿上遂以偃將中軍平公卽位偃帥師

敗楚侵方城之外代知瑩爲政十八年平公伐齊偃
禱於河而濟齊師遁遂以中軍克京茲反濟河而卒
諡曰獻子吳嗣職

士 勾士燮子靈王八年聘魯告將用師於鄭公享之
勾賦標有梅將出季武子賦彤弓勾曰先公文公受
彤弓於襄王以爲子孫藏勾也先君守官之嗣也敢
不承命君子以爲知禮十三年悼公蒐於綿上使勾
將中軍讓於荀偃而佐之十九年侵齊及穀聞喪而
還時稱知禮是年代荀偃爲政卒諡宣子士鞅亦執
晉政

直隸絳州志

卷之十

人物上

十

趙 武朔子盾孫也同括之難武從姬氏畜於公宮及
長韓厥請立之悼公卽位使佐新軍代范匄爲政令
薄諸侯之幣而重其禮宋之盟叔向說武務德無爭
先武從之乃先楚人相晉八年晉國無亂卒諡文
韓無忌厥之子悼公以其鎮靖與荀家荀會欒廩並爲
公族大夫使訓卿之子弟及厥告老將立之無忌有
廢疾辭請立弟起公謂無忌仁能長公族大夫卒諡
穆子襄平嗣職

韓 起厥之子無忌弟也無忌稱其賢讓立之悼公使
佐上軍靈王八年諸侯伐鄭起與荀偃將上軍鄭人

行成平陰之役起與趙武以上軍圍廬還自沂上魯襄公賜以三命之服二十五年聘於周王使請事對曰晉士起將歸時事於宰旅無他事矣王曰韓氏其昌阜於晉乎二十六年宋向戌欲弭諸侯之兵以告晉起言而許之後聘魯觀書於太史氏見易象與魯春秋曰周禮盡在魯矣聘鄭起有玉環其一在鄭商起買諸賈人子產不可起遂辭玉列聘諸國賦詩贈答無失禮後代趙武爲政卒諡宣子須

祁 奚爲晉悼公中軍尉平公卽位爲公族大夫請老公問嗣稱解狐其讐也將立之而卒又問對曰午也

直隸絳州志

卷之十

人物上

十一

可時羊舌職死公問孰可代奚舉羊舌赤君子謂奚能舉善稱其讐不爲諂立其子不爲比舉其偏不爲黨後叔向以其弟羊舌虎黨欒盈見執奚與范宣子言諸公而免之

魏 絳魏犇子晉悼公時爲中軍司馬公弟揚干亂行於曲梁絳戮其僕公欲殺之絳授僕人書將伏劍公讀其書跣而出曰吾子之討軍禮也子無重寡人之過使佐新軍絳請和諸戎曰諸侯新服我德則服否則攜貳勞師於戎諸華必叛公說使絳盟諸戎修民事田以時又請施舍以息民三駕而楚不能與爭賜

以金石之樂卒諡莊子舒執晉政

師 曠字子野爲晉樂師悼公曰衛人出其君不亦甚乎對曰或者其君實甚天之愛民甚矣豈其以一人肆於民上以從其淫而棄天地之性必不然矣平公時聞有楚師師曠曰吾歌南風多死聲楚必無功景王十二年石言於晉魏榆曠曰石不能言或馮焉不然民聽濫也抑或作事不時則有非言之物而言叔向曰君子之言信而有徵

士 鞅士勾子晉平公時爲公族大夫靈王二十三年欒盈帥曲沃之甲因魏舒以入絳士勾奉公如固宮

直隸絳州志

卷之十 人物上

十二

鞅逆魏舒命驅之士勾逆諸階賂以曲沃欒氏乘公門鞅用劍以帥卒乃退欒氏

荀 吳偃子晉平公時卿景王十七年吳自著雍以上軍侵鮮虞大獲而歸十八年帥師圍鼓鼓人或請以城叛弗許使鼓人殺叛人而繕守備告力盡而後取之不戮一人卒諡穆子寅

絳縣老人無子晉平公時食輿人之城杞者往與於食使之年曰臣生之歲正月甲子朔四百有四十五甲子矣其季於今三之一也吏走問諸朝師曠曰七十年矣趙孟召之而謝過焉使助爲政辭以老以爲

絳縣師

羊舌大夫有友爲申生尉申生被讒或勸之行曰不可
違命不孝棄事不忠子其死之其少也恭而順心有
恥而不使過宿其爲大夫也悉善而謹其端其爲輿
尉也信而好直其功至於其爲容也溫長而好禮博
聞而時出其志此羊舌大夫之行也孔子云

羊舌職羊舌大夫子簡王十八年爲晉中軍尉佐悼公
以職之聰敏肅給也故使之

羊舌赤字伯華職之子職卒悼公使代父任食邑銅鞮
其爲人之淵源也多聞而難誕內植足以沒其世國

直隸絳州志

卷之十

人物上

十三

家有道其言足以治無道其默足以生蓋銅鞮伯華
之行也孔子云

羊舌肸字叔向職之子赤之弟靈王二十七年諸侯之
大夫盟於宋宋公享之晉趙武爲客楚子木與之言
弗能對叔向侍言子木亦不能對景王十年鄭人鑄
刑書叔向使詒子產書曰國將亡必多制其此之謂
乎晉韓宣子之適楚也楚人弗逆公子棄疾及晉境
晉侯將亦弗逆叔向曰楚辟我衷若何效辟乃逆之
見單子視下言徐決其將死聞魯昭公之不感而知
其失國其言多驗事悼平昭三公幾四十年以德義

輔君以博識嫺禮聞列國孔子稱爲古之遺直娶於
申公巫臣氏生伯石黨於祁盈而助亂殺之遂滅羊
舌氏

魏 舒絳子敬王二年代韓宣子爲政分祁氏之田以
爲七縣分羊舌氏之田以爲三縣使司馬彌牟等十
人爲之大夫子戊亦與焉仲尼聞魏子之舉也以爲
義曰近不失親遠不失舉梗陽人有獄賂舒以女樂
辭之

董安于趙鞅臣敬王二十四年晉荀寅范吉射將攻趙
鞅安于告鞅曰先備之鞅曰晉國有命始禍者死安

直隸絳州志

卷之十

人物上

十四

于曰與其害於民寧我獨死鞅不可知文子使告趙
孟曰范中行氏雖信爲亂安于則發之二子旣佐其
罪矣安于曰我死而晉國寧趙氏定將焉用生乃縊
而死趙氏祀安于於廟

方立誠云左國諸書紀列國者十之五六紀晉者
十之四五意晉國人文實有不可滅沒者耶孔子
稱列國大夫凡十晉獨居五曰趙文子曰隨武子
曰銅鞮伯華曰羊舌大夫曰介山子推至於董狐
之爲良史趙盾之爲賢大夫並取而稱美之何其
盛與惜乎河上迴轅晉未有車轍馬跡使孔子親

臨其地其流風餘韻必有經聖裁而愈顯者又當何如也說者謂唐虞三代之遺風餘思尚存焉故賢人君子往往出於其間世風丕變仰機利者日漸流於競逐較錙銖角奇贏始於營積繼以驕奢終於貪刻風俗人心不可言矣夫豈後人不逮於昔哉予謂賢士大夫有轉移風會之責砥波廻瀾止在一風厲閒苟以好賢樂善爲尚則好賢樂善誠足尚矣苟以攘利損人爲賤則攘利損人羣知其爲可賤矣苟以奢僭輿服爲可鄙則里中之人咸知奢僭輿服爲可鄙矣里無矜炫則人心朴時無華耀則風俗厚賢人君子有不項背相望於其閒哉吾願賢士大夫先民是程大猷是經俾前人不得專美於昔詎不美與

劉顯第曰師服士蔦畢萬卜偃荀息欒枝史蘇先軫竇犇士燮士句知瑩解揚張老祁奚魏顆魏絳伯瑕狼曠士鞅等皆晉人晉都於絳則皆絳人也但故絳舊址在州北二十里外太平縣界內一在州東南五十里外曲沃縣界內所謂晉者當與太平曲沃鼎分之矣然皆無古蹟可考如堯陵在平陽今遣官所祭者乃在山東李太白蜀人也或以

爲隴西或以爲山東或以爲夜郎皆稱故里賢人君子所生各異人皆樂與之同里東西南北共此域中高節清風聞聲知慕人之懿好則然此吾於晉國諸賢知其爲絳而願吾州之祀之也

按舊志載周時人物僅有士會韓厥韓起董狐荀林父荀吳趙武羊舌大夫羊舌職卻縠羊舌赤羊舌肸師曠十三人俱列入鄉賢凡晉之賢士夫人多所遺漏未知去取何憑又所載十三人不分時代先後尤乖體例今就左傳國語史記諸書所載晉國人物擇其卓卓表見者按年補入且人物旣

繫諸周宜編周王年號今悉按年填載再考故絳舊址在今州北二十里外太平縣界內新絳在今州東南五十里外曲沃縣界內茲所載晉國諸人里居湮沒無考未必盡在今絳州界中然主名有在不得旁入太平曲沃反見屏於絳志也况古者倉氏庾氏有以官名其氏者想多以家就官則雖如卻缺舉於冀師曠傳爲古羊邑人而旣宦於絳姑列絳州人物門查左傳杜註最爲近古於晉國諸大夫罕有紀其里居者倘有博學君子知其確非絳產仍不妨另載他邑茲或不免借才之憾云

後周

楊 擲字顯進正平高涼人父猛爲邵郡白水令擲少
豪俠有志氣魏爾朱榮殺害朝士城陽王元徽逃難
投擲擲藏而免之以義烈聞擢拜伏波將軍轉正平
郡守累功封邵陽縣伯祀鄉賢

隋

程 元因薛收而見於文中子與之言六經退謂收曰
夫子載造爨倫一匡皇極微夫子吾其失道左見矣
元嘗偕收見文中子問曰二生之學文奚志也對曰
尼父之經夫子之續不敢怠也文中子曰允矣君子

直隸絳州志

卷之十

人物上

十七

展也大成居而安動而變可以佐王矣文中子嘗謂
聞過而喜程元能之謂李靖智勝仁程元仁勝智又
嘗許程元王季逸之文王凝曰夫子得程仇董薛而
六經益明對問之作四生之力也

霍 汲隱於漁精樂律文中子嘗曰吾正樂於霍生見
持竿者幾焉吾將退而求諸野矣

唐

敬君弘累功封黔昌侯以屯營兵守玄武門隱太子之
死與中郎將呂世衡呼而進皆戰沒

裴 淮聞喜縣人裴琰之子徙居絳州舉明經遷監察

御史時崔湜鄭愔典吏部坐姦賊爲李商隱所劾詔
漼按訊漼執正其罪天下稱之睿宗造金山玉真二
觀旱甚役不止漼上疏諫開元中累遷吏部侍郎甄
拔士類爲多擢吏部尚書改太子賓客卒諡懿祀鄉
賢

譚 忠祖琮天寶末令內黃殉城忠豪健喜兵范陽節
度劉濟與二千人障白狼口後將漁陽軍留范陽元
和五年伐趙魏博節度田季安欲先捍之忠時使魏
入語季安曰是引天下之兵也不如悉甲壓境陰遣
趙人書使遺魏一城魏得持之奏捷則霸基安矣季

直隸絳州志

卷之十

人物上

十八

安曰善遂用其謀忠歸燕謀欲激燕伐趙會濟合諸
將議忠疾對曰天子必不使我伐趙趙亦不備燕濟
怒擊之使人視趙果不備燕後一日詔果來使無伐
趙濟召問何以知之忠曰此潞盧從史計以燕販忠
也濟乃下令軍中曰五日畢出後者醢以徇遂屠趙
饒陽束鹿十四年趙人獻城冬誅濟忠因說濟弟總
曰凡天地數窮合必離離必合河北於天下相離六
十年矣此亦數之窮也必與天下復合總泣且拜曰
吾心定矣明年春總去范陽卒於趙忠護喪西數日
亦卒忠官至御史大夫弟憲安次令祀鄉賢

宋

薛 奎字宿藝舉進士性剛不苟合遇事敢言又能知人善任以嚴治京師以寬治蜀皆以最稱遼使蕭從順請見章獻后奎獨以理折之乃止章獻后欲以袞冕謁太廟奎力陳其不可后不能奪爲改服章獻崩上泣謂羣臣曰太后頃數引其衣若有所屬何也奎曰其在袞冕也服之豈可見章聖於地下卒以后服斂上嘗數宴大臣奎諫曰天下誠無事而大臣數被酒無威儀非所以重朝廷也上嘉納焉累官至龍圖閣學士叅知政事卒諡簡肅子直孺謹飭好學早卒

直隸絳州志

卷之十

人物上

十九

以弟子仲孺嗣廕將作監主簿累遷太子右贊善大夫殿中丞兄睦有隱操以恩例補右班殿直居頃之棄去不復仕以德行文學爲鄉善人弟塾以恩例官內殿崇班兄子長孺尚書虞部員外郎知絳州軍事良孺國子博士俱歐陽修誌表其墓祀鄉賢

孟宗政字德夫父林從岳飛至隨州僑家焉宗政有膽畧爲京西鈐轄駐劄襄陽屢敗金人代許國爲荆鄂都統制中原遺民來歸者萬數發廩贍之給田創屋與居籍勇壯號忠順軍威振境外金人呼爲孟爺爺病卒轉右武大夫團練使防禦使生平好賢樂善賞

不遺仇罪不避親死之日邊城罷市慟哭祀鄉賢

孟 珙字璞玉宗政子屢卻金兵授忠翊郎又辟京西第五副將權管神徑左右軍統制初宗政招唐鄧蔡壯士二萬餘人號忠順軍命江海總之衆不安以珙代分其軍爲三衆乃帖然復創平堰於棗陽建通天水槽溉田十萬頃紹定六年元逼蔡檄珙戍鄂討金唐鄧行省武仙屢破之武仙奔還軍襄陽轉修武郎鄂州江陵府副都統制元遣王楫約攻蔡珙請以二萬人行拔其城降其丞相烏古論栲栳殺其元帥兀林達端平二年授主管侍衛馬軍司公事駐黃州朝

辭問恢復對曰願寬民力蓄人材以俟機會問和議對曰臣當言戰不當言和賜賚甚厚兼知光黃州節制黃蘄光信陽四郡軍馬元兵攻蘄州襄陽躬往節度破砦二十有四還民二萬收復京襄珙謂必得郢然後可通餽餉得荆門然後可出奇兵由是發兵深入所至以捷聞拜寧武軍節度使四川宣撫使釐蜀弊政爲條頒諸郡縣五年以職事修舉轉行兩官許回授珙至江陵登城嘆曰敵一鳴鞭卽至城外乃修復內隘十有一別作十隘於外障漳水爲巨浸民不知役病革嘆曰三十年收拾中原人今志不克伸矣

卒於江陵府治是月朔大星隕境內聲如雷贈太師封吉國公諡忠襄廟曰威愛珙忠君體國可貫金石名位雖重惟建鼓旗臨將吏而色凜然退則焚香掃地隱几危坐蕭然事外遠貨色絕滋味其學邃於易著警心易贊亦通佛學自號無庵居士

金

李 愈字景韓正隆間進士慷慨尚志節大定間典解郡明昌中召授曹王傅從王賜宴北部還奏諸部貢馬止可委招討司受於界上量給廻賜省費以廣邊儲擬沿邊創設重鎮十數田給於軍者許募漢人佃

直隸絳州志

卷之十

人物上

二十一

種不必遠輓而兵自富強上嘉其忠尋擢河南路提刑使以最著改河平軍節度使遷刑部尚書奏除陳言洩漏科罪舊條以廣言路上將巡幸長樂以屢諫乃止復授河平軍節度使改知河中府事致仕卒諡清獻所著狂愚集二十卷祀鄉賢

梁 襄字公贊父定早亡養於叔父寧性穎悟日記千餘言大定三年進士令淳化有善政察廉升慶陽府推官召爲薛王府椽時世宗將幸金蓮川上疏極諫世宗納之遂罷行襄由是以直聲聞擢禮部主事太子司經選爲監察御史尋轉中都路都轉運戶籍判

官未幾遷通遠節度副使以喪去服闋授安國軍節度副使同知定武軍節度使避父諱改震武軍太常卿張暉曹州刺史段鐸薦襄學問該博練習典故可任禮官轉同知順義軍節度使事歷東勝州隴州刺史終保大軍節度使襄長於春秋左氏傳至地理氏族無不該貫自蚤達至晚貴膳服常淡薄人士雅欽之祀鄉賢

梁持勝字經甫保大軍節度使襄之子多力善射泰和六年進士復中宏詞科累官太常博士遷咸平路宣撫使經歷興定初宣撫使蒲鮮萬奴有異志欲棄咸

直隸絳州志

卷之十

人物上

二十一

平持勝力沮萬奴怒杖之上京行省太平與萬奴通謀口稱持勝忠署左右司員外郎而焚毀上京奪元帥承充軍持勝與咸平治中裴滿賽不萬戶韓公恕約殺太平復推承充行省事事泄俱被害贈中順大夫韓州刺史

孫 鎮字安常高才博學嘗中省試魁承安二年五赴廷試賜第以陝令致仕年八十四卒所著見總目祀鄉賢弟寧州刺史錡字安世潘原令鉉字安道同榜擢第鄉人榮之號三桂孫氏

元

孔錦山字晉望雄勇多智畧善騎射初襲父爵千夫長
從征累有功戰於茶山時墜馬騰上者三咎安撫嘆
曰眞奇士也世祖賜錦衣弓矢鞍勒諭以回跖之事
錦山對曰人惟爲善則美名自臻累陞碭門等處鎮
守萬戶子禿魯卜有父風次也先不華俱碭門等副
千戶佩虎符祀鄉賢

張仲儀字伯威由絳州學正入翰林改杭州路總管府
判官稱能吏海寧潮溢沒民田廬仲儀禱於海神水
隨退遷江西行省左右司都使歲饑民將爲變仲儀
單騎出撫之民感泣散去言於省臣發粟賑濟擢亞

直隸絳州志

卷之十

人物上

二十三

中大夫撫州路總管卒年六十九封正平縣男明宋
濂銘其墓祀鄉賢

姚天福字君祥讀春秋通大義辟懷仁丞至元中召拜
監察御史條奏宰相阿合馬罪二十有四召廷辨天
福枚數之至於三氣沮色喪上曰此三者罪已在不
宥因目天福曰巴兒思臣下有違太祖之制干朕之
紀者汝抨擊之無隱廷臣皆震悚巴兒思者謂不畏
強悍猶虎也帝仍加厚賜天福曰言臣分也受賞非
分也卒不受時御史臺置二大夫天福曰古稱一蛇
九尾首動尾隨一蛇二頭不能寸進今臺綱不張有

一蛇二頭之患陛下不急拯之少則紊不可理大夫
李羅遂以年少引退按行畿輔時監敢普得罪御史
按之不服天福廉得其死罪十有七俄以宥免經臺
門大詬急捕之檢行囊得賄侍御史安兀失納救免
狀明日陞奏上曰彼七死猶赦汝欲何爲天福對罪
十有七條赦七留十餘誰歸上悟戮敢普而斥安十
二年罷按察司天福曰是司之設所以廣視聽虞非
常慮至深遠不但繩有司已也大夫王昔帖木耳駭
曰微公言幾失之夜入帝卧內奏其言帝大悟詔復
立阿合馬益不悅左遷衡州路同知不就後歷河東

淮西湖北諸道按察使善辨疑獄大德四年拜叅知
政事大都路總管兼大興府尹六年卒年七十三諡
忠肅祀鄉賢

尉遲天澤仕金爲庫官郡王帶孫拔絳州澤在俘中道
見兵死者輒涕泣收瘞之帶孫令佩金符授霍州御
衣局總管子翥仕至潞州知州

尉遲德誠字信甫歷官太子率更丞遷家令司丞仁宗
以爲謹恪常賜酒帛得侍左右數薦士出則未嘗語
人廳事前有粟苗不種而萌偶出一莖雙穗衆以爲
嘉禾遷河東山西道宣慰司同知擊姦吏寬稅斂上

計入見上方食賜以餽餘擢工部尚書未拜改陝西
行臺治書侍御史遷京畿都漕運使拜遼東道肅政
廉訪使上疏言事曰勞諸王以懷其心防出入以嚴
宮禁立諫官以遠讒佞崇科舉以求人才立常平以
備荒年汰僧道以寬民力舉賢良以勵忠孝抑奢侈
以厚風俗及拯鈔法裁冗官等事未報卒年五十三
祀鄉賢

韓亨甫由中書省椽授監察御史後調東平路總管至
正閒毛貴作亂守城死節贈陝西行中書叅議祀鄉
賢

直隸絳州志

卷之十

人物上

二十五

李思敬字君讓由中書省西曹椽累仕至肅政廉訪使
以孝廉稱祀鄉賢子僕有文學授榆社縣尹後至肅
政廉訪副使孫士林亦貴時名其里曰登瀛